

## **MOCIÓN DE AER SOBRE ASISTENCIA ACTOS RELIXIOSOS**

PLENO 29 FEBREIRO 2012. ACTA 2/2012

Antecedentes

Moción de AER que, transcrita, dí:

Jorge Varela Couñago, concelleiro da Agrupación de Electores de Redondela, en base ao artigo 19 do Regulamento Orgánico do Concello de Redondela e ao artigo 97 do Regulamento de Organización, Funcionamento e Réxime Xurídico das Entidades Locais, presenta a seguinte MOCIÓN, pra o seu debate, e no seu caso, aprobación no vindeiro Pleno Ordinario.

### EXPOSICIÓN DE MOTIVOS

As festas locais teñen un forte arraigamento de tradición relixiosa, iso e innegable. Non obstante, e máis ala da tradición, convén ter presente o contido do artigo 16.3 da Constitución "*ningunha confesión terá carácter estatal*".

Se dentro do programa de festas se quere incluír algún tipo de cerimonia relixiosa, pouca xente se oporía. Outra cousa ben diferente é o rango que se lle dea a dito acto relixioso o papel que nel deban xogar os cargos públicos, representantes dunha administración que debe actuar con imparcialidade, aconfesionalidade e sometemento pleno a Lei e ao Dereito.

Non se trata de impedir que os concelleiros que profesen algunha relixión vaian a esa cerimonia, senón de que a "Corporación Municipal", como tal, teña presenza nun rito relixioso, e que ademais deba xogar un papel determinado ou acudir con distincións e honras corporativas.

Respectamos que a xente viva as festas con devoción relixiosa, pero consideramos inapropiado que, nun estado aconfesional, se sigan a mesturar as institucións políticas e relixiosas. Non pode obviarse que o ben xurídico que protexen a Constitución e a "Lei Orgánica de Liberdade Relixiosa" teñen unha vertente positiva (o cidadán terá as crenzas e ideas que estime mais adecuadas sen sufrir presión ou represalia algunha) e unha negativa (non se lle pode impoñer ao cidadán ningunha relixión). Isto implica non obrigar aos que non comparten esas mesmas crenzas a ter que soportar as manifestacións das anteriores de forma permanente nos espazos públicos.

A necesaria "cooperación coa Igrexa Católica y demais confesións"(art. 16.3 CE) non ten nada que ver coa participación dunha Corporación Municipal nun acto relixioso.

Unha cousa é que as administracións respecten as crenzas dos seus cidadáns e incluso faciliten a súa práctica relixiosa, e outra ben diferente que os representantes do conxunto dos cidadáns (crentes de diferentes confesións, agnósticos e ateos) acaben formando parte dun rito relixioso sen eles desexalo.

É cada vez máis habitual que, coa chegada de diferentes festas no noso concello, os diferentes responsables das igrexas de Redondela coloquen altofalantes cos que poder retransmitir os seus actos relixiosos a todos os veciños e veciñas dos arredores, queiran estes escoitalos ou non. Cremos que con estas actitudes estanse a incumprir algúns dos artigos da *Lei Orgánica 7/1980, de 5 de xullo, de Liberdade Relixiosa*:

*Lei Orgánica 7/1980, de 5 de xullo, de Liberdade Relixiosa.*

*Artigo Segundo.*

*Un. A Liberdade Relixiosa e de culto garantida pola Constitución comprende, coa conseguinte inmunidade de coacción, o dereito de toda persoa a:*

*2b. Practicar os actos de culto e recibir asistencia relixiosa da súa propia confesión; conmemorar as súas festividade; celebrar os seus ritos matrimoniais; recibir sepultura digna, sen discriminación por motivos relixiosos, "e non ser obrigado a practicar actos de culto ou a recibir asistencia relixiosa contraria as súas conviccións persoais".*

*Artigo Terceiro.*

*Un. O exercicio dos dereitos derivados da Liberdade Relixiosa e de Culto ten como único límite, "a protección do dereito dos demais ao exercicio das súas liberdades públicas e dereitos fundamentais", así como a salvagarda da seguridade, da saúde e da moralidade pública, elementos constitutivos da orde pública protexido pola Lei no ámbito dunha sociedade democrática.*

A AGRUPACION ELECTORES DE REDONDELA defende a aconfesionalidade do Estado e das súas institucións que recolle a Constitución española, tamén en Redondela.

Por iso AER pide a non participación da Corporación en manifestacións de tipo relixioso.

AER manifesta que ningún dos seus cargos públicos participará en actos relixiosos. Obviamente, quen desexe acudir a celebracións das súas confesións relixiosas poderá facelo, pero sempre a título individual. Por iso, pedimos o Alcalde e o resto de concelleiros da corporación que se deciden participar en actos de carácter relixioso, como procesións, misas maiores, ofrendas florais, etc, o fagan a título persoal, e sen ningún signo externo nin protocolario de representación pública do Concello de Redondela

Asemade, AER cree que os corpos e forzas de seguridade do Estado non deberían acudir a actos relixiosos en representación da autoridade pública.

**Por todo o anteriormente exposto, a Agrupación de Electores de Redondela propón ao Pleno do Concello os seguintes acordos:**

**1.- O Pleno do Concello de Redondela acorda a NON participación da Corporación en manifestacións de tipo relixioso. Igualmente acorda que os actos oficiais organizados polo Concello non terán manifestacións de tipo relixioso.**

Só en casos excepcionais, e previo acordo da xunta de voceiros, poderá haber representación do Concello en actos relixiosos (defunción dalgunha persoa ilustre, incidentes con vítimas no concello, vítimas da violencia de xénero)

2.- O Pleno do Concello de Redondela acorda delegar no concelleiro competente a relación cos representantes da Igrexa no concello de Redondela. O resto de Concelleiros, cando participen en cerimonia de tipo relixioso, farano a título individual e en ningún caso na súa condición de autoridade ou representante político.

3.- Cando algunha confesión relixiosa que conte con espazos propios en Redondela, inste a colaboración do Concello para un evento relixioso, a participación municipal será garantir a seguridade e limpeza que require habitualmente calquera mobilización ou acontecemento cidadán.

4.- O Concello, para garantir *"a protección do dereito dos demais ao exercicio das súas liberdades públicas e dereitos fundamentais, e non ser obrigado a practicar actos de culto ou a recibir asistencia relixiosa contraria as súas conviccións persoais"*, non permitirá a difusión, mediante megafonía, de ningún tipo de evento ou cerimonia relixiosa, salvo en casos puntuais (festas patronais ou eventos nos que se sobrepare o aforo dos espazos dedicados ao culto).

#### VOTACIÓN E ACORDO

Sometido o asunto a votación, a Corporación en votación ordinaria e por 10 votos en contra (PP), 3 a favor (2 do BNG e 1 de AER) e 8 abstencións (PS de G-PSOE), acordou rexeitar a moción transcrita .